

ATTERU NON PEDO

Isterride turres morénas
 sas divinas armonias
 de su brunzu arcanu
 a s'ora 'e su ésperu,
 cando a su serenu
 si regoglin in segretu
 sos tremidos de s'ispiritu,
 e tramente, in chelu,
 s'accerat trampadora
 sa messadolza 'e luna
 tra-e sos salighes
 immandronidos.

Atteru deo non pedo
 si no' chi su frusciare
 de sas frunzas nudas
 che sigat su 'entu
 fin' a sa costera
 pro b'annodare s'orizu
 a sas pedras de sale,
 miscende sos sonos techidos
 de terra e de abba,
 de oe e de sempre.

Lassàde a mie s'acconnòltu
 de sos cantos banduleris
 chi m'ischidan'in s'anima
 sos sentidos ingalenàdos.
 Ad atteru no' atténdo
 si no' a su frigonzu
 de s'unda 'e marea
 subra 'a sa pedrighina
 e a sa oghe 'e su mudòre
 de-i custà terra antiga,
 inùe so' ancora inficchìdu
 cun raighinas de ramene...

Ma pro cantu ancora?

NON CHIEDO ALTRO

*Dischiudete torri moresche / le armonie divine / dei bronzi arcani / all'ora del
 vespero, / quando al crepuscolo / si raccolgono in segreto / i tremiti dello
 spirito, / mentre, nel cielo, / s'affaccia ingannatrice / la falce di luna / tra i
 salici impigriti.*

*Altro non chiedo / se non che il fruscio / delle fronde nude / insegue il vento
 / fino alla costa / per annodarvi l'orlato / alle pietre di sale, / unendo i suoni
 ameni / di terra e d'acqua, / d'oggi e di sempre.*

*Lasciate a me il conforto / dei canti vagabondi / che risvegliano nell'anima
 / le sensazioni assopite. / Ad altro non bado / se non allo sfrigolio / dell'onda
 di marea / sulla ghiaia minuta / e alla voce del silenzio / di questa terra
 antica, / dove sto ancora conficcato / con radici d'erba gramigna...*

Per quanto ancora?